

**Un aresto
durante
Parada di
Flambeu**

LAMENTABEL

Crimen pasional na Resort a finaliza den bulamento di balcon

ORANJESTAD (AAN): E hipotesis ta cu un turista masculino den un of otro forma a mata su casa den camber di Resort local, y despues e mes a bula for di balcon di piso halto y termina cu su mesun bida. Esey ta e escena cu Polis di Aruba a topa cu ne Diadomingo mainta. Na prome instante a kere cu e turista Mericano haya benta abao den area di piscina a cay accidentalmente. Pero despues cu a bay na halto, a bin haya su señora morto den camber. Mas detaye di e caso awe den DIARIO.

**CULTURA**

Parada di Flambeau cu yen di ambiente



ORANJESTAD (AAN): Diasabra anochi e mecha di Parada di Flambeau a ser cendi door di SMAC hunto cu Setar NV. E parada tabata yen di ambiente y por a mira caranan yen di sonrisa den tur skina riba caya.



Militarnan a train varios luna riba replica exacto di cas di Maduro

■ *Atake riba Venezuela*

• *Ta sospecha su bodyguard di ta 'infiltrante'*

Hopi rond mundo feliz cu caida di Maduro



CARACAS: Diasabra marduga uzando avionnan y drones sofisticada pa tira bomnan preciso riba blanconan militar na Venezuela, miembronan di Delta Force di US Army a sa di penetra, detene, y sali cu president Nicolas Maduro y su casa di e pais, y algun rato despues ya ta abordo di un barco Mericano, pa despues wordo traslada cu avion pa por yega New York, unda por mire aki sinta mey-mey oficialnan di diferente agencia. Pueblo a reacciona mesora cu euforia cu porfin e dictador no tey mas.



Investigacion di autoridad na Aruba

Crimen pasional na Highrise Hotel a finaliza den bulamento di balcon

ORANJESTAD (AAN): Tabata Diadomingo mainta pa 8:44 am, cu yamada a drenta na Central di Polis, caminda personal di The St. Regis Aruba Resort na forma urgente a indica cu un persona a caba di cay for di balcon y e ta benta eybao na suela y no ta duna señal di bida.

Inmediatamente a cuminsa manda un patruya di Polis, y na mesun momento a informa Centro di Alarma pa nan despacha un unidad di Ambulance pa e lugar.

E prome unidad di Polis cu a yega, a pasa di biaha pa e area pafo di lobby cerca di zona di piscina, y a bin topa cu un persona masculino benta eybao y e no ta reacciona.

Paramediconan a yega y mesora a bay check e senjaldnan vital di e persona, pero e no tabatin nada. Nan a informa Polis pa mihor pone



Docter na altura, como cu e persona no ta parece di ta na bida. Mientras tanto personal di e Resort a bisa cu ta trata aki di un turista masculino cu ta hospeda eynan, y e ta di nacionalidad Mericano.

Central di Polis na su turno a notifica tur instancia concerni den casonan asina, incluyendo Recherche, team forensico di BFTO, Docter, y Bureau Slachtofferhulp pa

yega eynan.

For di observacionnan, ta muestra cu e turista aki lo a bula for di balcon di un di e pisonan mas halto di e Resort. Polis mientras tanto a seya e zona abao, pa evita cu cualkier hende ta yega cerca.

Mas despues Polis hunto cu personal di e Resort a bay halto pa asina controla e camber di e victima. Pa nan sorpresa den e camber, a bin topa cu un señora cu tampoco no tin señal vital. A laga Paramediconan bay na halto tambe den e camber pa check esey, y no tabata haya pulso ni batimento di curazon mas.

E camber tambe a wordo seya, y Polis a cuminsa pensa cu ta trata aki di un acto di asesinato/suicidio. Pues e homber lo a mata su casa, y despues a bula fo'i balcon pa caba cu su mesun bida. Toch tur detaye di esaki tin di wordo investiga. A bin haya sa cu e señora morto, ta casa

cu e homber cu a ser haya abao benta.

Bureau Slachtofferhulp a duna yudanza na cualkier otro huesped cu por a mira e homber benta abao, y tambe a duna palabranan pa trankiliza e personal di e Resort.

Vocero di Polis, Liliana Rasmijn a indica cu esaki ta un caso lamentable y inusual, pero e investigacion di parti autoridadnan concerni lo por yuda haya claridad di e asunto. E oficial di Polis no por a duna mas detaye, ni e edad di esnan cu a fayece.

DIARIO hunto cu Cuerpo Policial ta manda palabranan di condolencia na famia di e fayecidonan.

Parada di Flambeau a conta cu 1 detencion

*Cuerpo Policial ta hopi contento cu e bon comportacion



ORANJESTAD (AAN): Diasabra anochi pa exactamente 8:00 pm Parada di Flambeau a start sali for di dilanti ex-Kooyman na Avenida Milo Croes. Cuerpo Policial conhuntamente cu SMAC a haci inicio di e parada.

KPA tabatin 150 polis di diferente departamento cu a traha durante e parada, entre otro: Polis uniforma, K-9, ME, AT, Recherche, Personal Administrativo y personal di CEA.

E cabez di e parada a yega pa 00:55 na ex-DOW y pa 02:41 e final a yega.

E aña aki a conta cu solamente 1 detencion relaciona cu posicion di droga.

Aña 2025 e parada di Flambeau a conta cu 0 detencion.

KPA ta hopi orguyoso di mira hopi hende persona cu a comporta nan mes prome, durante y despues di parada! Esaki sigur ta di aplaudi.



**BUY 2 MEDIUM
BBQ CHICKEN
—OR—
2 TOPPINGS
PIZZAS**

AND GET CHOICE OF

BREADSTIXS | CINNASTIXS
16 PCS PARMESAN BREAD BITES
3 MARBLED COOKIE BROWNIE

**—FOR—
FREE
FOR 45⁰⁰
AWG**







STA CRUZ
585 0333

PALM BEACH
586 0333

PARADERA
582 0333

SAVANETA
584 0444

BOULEVARD
583 0333

ORDER AT
DOMINOSARUBA.COM

Download on the App Store | GET IT ON Google Play

Atake riba Venezuela

Militarnan a train pa varios luna riba un replica exacto di cas di Nicolas Maduro

• Ta sospecha cu un Bodyguard ta e persona infiltrante cu a duna Merca tur detaye



CARACAS: Ora cu Diasabrá mainta a habri, ora cu tur hende na Venezuela ta puntrando nan mes ta kico ta pasando, y unda Nicolas Maduro ta, e contesta a bin den un mensahe difundi door di President Donald Trump di Merca, kende a confirma cu tropanan Mericano a captura y saca Nicolas Maduro di Venezuela, despues di a lanza un atake “di gran escala” contra e pais. Trump a warda te ora cu Maduro ta abordo di e barco amfibico USS Iwo Yima prome cu el a divulga e captura.

“Merca a caba di ehecuta cu exito un atake di gran escala contra Venezuela y su lider, president Nicolas Maduro, kende hunto cu su casa, a wordo captura y saca di e pais,” el a indica den un mensahe.

E accion tabata un sorpresa, pero segun fuentenan cu tabata na altura di e asunto, e planning di un di e operacionnan Mericano mas complica di ultimo temponan a bin ta wordo prepara desde varios luna pasa caba, y hasta tabatin training detaya riba esaki.

Delta Force den accion: E tropanan elite di militar nan Mericano, incluyendo Delta Force di ehército, a hasta crea un replica exacto di e cas sigur di Maduro, y

nan tabata haci varios training con nan por drenta e cas cu ta fuertemente fortifica. Trump mes a bisa cu e cas



y cambernan tabata wordo proteha pa metalnan di hero.

Desde luna di Augustus 2025 caba, CIA tabatin na forma secreto un grupo reduci di agentenan cu ta riba teritorio Venezolano, y nan a logra compila datonan clave riba e rutina y custumber di tur dia di Maduro, y aparentemente esaki ta loke a yuda hopi den e accion di Diasabrá marduga y su detencion.

Infiltrante elite: Ademas di esaki, dos fuente mas a indica cu CIA di Merca

tabata depende hopi di un colaborador hopi cercano di Nicolas Maduro, y e persona infiltrante aki tabata

vigila di forma constant su movimiento, y tabata cla pa duna su localizacion preciso en vivo ora cu e operacion a start Diasabrá marduga.

Algun hende a cuminsa pensa cu kizas ta Delcy Rodríguez cu su casa tabata yuda e Mericanonan. Pero fuentenan mas cercano ta convenci cu un di e bodyguards elite di Maduro mes, ta esun cu tabata duna detaye constant di e paradero di Maduro.

Maduro tabata drumi casi tur anochi na un localidad scondi, pues tabata depende

di e bodyguard aki pa ‘feed’ Mericanonan cu e detaye exacto di su lugar di keda y drumi anochi. Tin indicacion cu Diasabrá marduga, e tabata drumi den un camber-bunker ta Fuerte Tiuna.

Cera espacio aereo: Pentagon di Merca a manda diferente recurso discreto den e area, cu meta pa suministra combustibel na avionnan durante vuelo, tambe Drone y aparatonan special cu tarea di guerra electronico. Pesey a cera e espacio aereo panort di Venezuela y tambe esun controla pa Curaçao, pa Puerto Rico, y tambe parti pariba di Car-

Operacion a start: Tur cos a start banda di 1:45 am, ora algun hende na Caracas a cuminsa tende sonido di avion. Na prome instante nan a djis kere cu ta avion militar Venezolano. Pero ora cu bombardeo a start poco despues di 2:00 am contra infraestructura di caracter militar, nan a bin com-pronde loke ta pasando.


Merca a ataca e.o. e base aereo di La Carlota na Caracas, unda nan a destrui varios vehiculo militar cu ta pertenece na unidad di defensa anti-aereo di Venezuela.

E accion di drenta den lugar unda Maduro tabata drumi, lo a dura apenas 12 minuut. Na salida, algun helicopter a ricibi impacto di bala, pero no a stroba e navenan militar di sigui bula.

Den edicion awe di DIARIO tin hopi informacion di loke a socede, y tambe tur update cu a sigui den oranan di mainta, merdia, y atardi. Informacion con celebracion a start varios caminda na Venezuela, aunke Delcy Rodríguez a asumi presidencia, y por a tende Diosdado Cabello na forma arogante indica cu keto bay Chavismo ta na mando.

Celebracionnan tabatin na Aruba tambe, incluyendo Miami, Madrid, Lima (Peru), y na Santiago di Chile.

ibe Oriental. Pasobra tabatin hopi actividad militar andando, incluyendo re-fueling di avionnan di guerra durante vuelo.



E ta haya cu Machado no tin sosten ni respet pa haci esey

Donald Trump ta duda cu Maria Corina Machado por lidera Venezuela

WASHINGTON: President Donald Trump di Merca, durante conferencia di prensa a elabora riba e plannan di Merca pa yuda Venezuela haya pasa den transicion di Gobierno y haya uno nobo.

Pero e sorpresa tabata ora cu Trump a bisa, cu e no ta haya cu e lo bay ta un trabao pisa pa e lider di oposicion na Venezuela, esta Maria Corina Machado, pasobra no tin e sosten di tur hende na e pais, ni e respet pa maneha Venezuela. El a bisa esey, despues cu el a anuncia cu Merca lo yuda maneha Venezuela awor cu nan a detene president Nicolas Maduro.

Maria Corina Macha-



do a celebra e operacion Mericano pa captura Maduro bisando: "Esaki ta e ora di libertad".

Hopi ta keda pusha pa Edmundo González Urrutia mes bira e president y lider di Venezuela, pasobra tin hopi indicacion

cu e ta esun cu a gana e eleccion presidencial di 28 Juli 2024. Pero e entidad di gobierno Chavista, esta Consejo Nacional Electoral (CNE) no a admiti cu Mauro a perde e eleccion y mas bien sorprendentemente a bisa

cu ta Nicolas Maduro a gana, aunke hamas nan a saca e actanan oficial di resultado pa ningun hende mira. Varios Gobierno pesey no ta reconoce Nicolas Maduro como e ganador di eleccion di 2024.

Edmundo González Urrutia a haya mayoria di voto, segun 24.532 acta (como 81,7% di e total) a wordo recoge y presenta door di oposicion y revisa door di diferente entidad NGO rond mundo. Edmundo ta un internacionalista, diplomatico, profesor, y autor Venezolano. President di Francia a laga sa na Trump, cu e ta spera cu Edmundo lo wordo inaugura como president na Venezuela.

Maria Corina Machado aña pasa a ricibi e Premio Nobel di Paz, y el a hasta dedica esaki, parcialmente, na Donald Trump.

Parlamentario Evelyn Wever-Croes:

Gobierno tin di duna mas informacion y ta mas transparente cu pueblo

ORANJESTAD (AAN): Despues di a sigui e desaroyonan, cu a cuminsa den oranan tempran despues di mei anochi, en cuanto e sucedidonan na Venezuela, e prome reaccion di Parlamentario Evelyn Wever-Croes diasabra mainta tempran tawata cu tin falta di informacion na Parlamento despues cu Prome Minister Eman a duna su discurso mainta tempran. Segun e representante di pueblo, esaki a trece mas preocupacion ainda.

Parlamentario Wever-Croes a indica cu Fraccion di MEP mesora a haci peticion na Presidente di Parlamento pa yama Gobierno pa un



reunion urgente, un Seniorenen Convent. Segun e parlamentario, nan a haya contesta riba e preguntanan cu nan a haci y varios informacion no por comparti mirando cu ta trata di un Seniorenen Convent y ta den nivel di secrecia.

Un punto importante di e reunion tawata tocante a cancelacion di buelonan y esnan cu ta pega den

exterior. E parlamentario a menciona cu Partido MEP a ricibi hopi yamada di ciudadanonan cu ta desespera pasobra no por a tuma nan biahe bek pa Aruba. Parlamentario Wever-Croes, pa esaki a conseha Prome Minister Eman pa establece un punto di contacto pa asina e personanan aki por haya cierto guia y coneho, manera tawata e caso den tempo di Covid. E

parlamentario ta pidi pa tur esnan cu ta den exterior y ta pega ainda, pa keda tranquil. Gobierno di Aruba a priminti cu lo establece un punto di contacto pa duna mas informacion.

Un otro pregunta hopi importante cu Fraccion di MEP a haci Gobierno di Aruba ta si tin suficiente alimentacion na Aruba. Gobierno a sigura cu tin suficiente cuminda pa tres luna, tambe awa y gasoline. Esaki e institucionan encarga cu crisis a regla por lo tanto, segun e parlamentario, no tin motibo pa panico, apesar cu e situacion ta serio.

Finalmente, Parlamen-

tario Wever-Croes ta pidi comunidad pa keda tranquil y sigui canalnan oficial di noticia y uni den oracion pa pronto bin un solucion pa Venezuela y pa tur. "Union di nos pueblo tawata e exito pa enfrenta tur reto cu nos a encontra, nos a surpasa nan. Awo tambe, cu fe, confiansa y den union, usando sano juicio, nos lo sali di esaki tambe", e parlamentario a enfatisa.

Y pa loke ta trata informacion di Gobierno na nos comunidad, Parlamentario Wever-Croes ta bisa cu Gobierno tin di duna mas informacion y ta mas transparente cu pueblo.

Atake riba Venezuela

Cancelacion di vuelonan pa Caribe door di KLM a afecta como 2.600 pasahero



ORANJESTAD (AAN): For di Diasabra marduga cu a bira conoci cu militarnan Mericano a start un atake cu e mision principal pa captura president Nicolas Maduro na Venezuela, a pone cu dispatchernan di aerolinea KLM na Schiphol tuma un decision.

Combina cu e NOTAM emiti pa muestra cu ta restrin-

gui vuelonan den espacio aereo Venezolano y tambe espacio aereo controla pa Curaçao Radar, esey a pone cu e aerolinea a cancela tur vuelo pa y for di Caribe Hulandes.

Tur vuelo Diasabra pa Aruba, Curaçao, Bonaire, y St. Maarten a wordo cancela door di KLM, y en total como 2.600 pasahero a wordo afec-

ta. Esey ta loke KLM mes a indica den un boletin.

KLM a indica cu a cancela nan vuelo pa Georgetown (Guyana), tambe Bridgetown (Barbados), y tambe Port of Spain (Trinidad and Tobago).

E vuelonan pa Caribe Hulandes cancela door di KLM riba Diasabra tabata vuelonan KL-733, KL-735, KL-765, KL-775, y KL-783.

Mientras tanto, riba Diadomingo si ya caba KLM a bula bek pa Caribe Hulandes, y a trata di acomoda lo mas hopi pasahero cu a keda stagna riba Diasabra.

E organizacion di viahe TUI Fly tambe a cancela vuelonan pa Islanan ABC. Nan a cancela 3 vuelo, y a afecta

TIME	DESTINATION	FLIGHT	COUNTER	STATUS
11:29	Newark	jetBlue B6 2420	51-54	CANCELLED
11:50	Boston	jetBlue B6 574	48A-50	CANCELLED
12:05	New York (JFK)	jetBlue B6 1858	52-55	CANCELLED
12:35	Boston	jetBlue B6 774	50-53	CANCELLED
12:40	Atlanta	FRONTIER F9 321	47-46	CANCELLED
13:05	New York (JFK)	jetBlue B6 1058	51-54	CANCELLED
13:10	Newark	UNITED UA 1032	57-60	CANCELLED
13:20	Boston	jetBlue B6 474	48B-51	CANCELLED
13:30	Dallas	AA 1143	39-42	CANCELLED
13:35	Charlotte	AA 874	39-42	CANCELLED
13:35	Boston	DELTA DL 1761	61-64	CANCELLED
13:45	Atlanta	DELTA DL 1752	63-66	CANCELLED
13:49	New York (LGA)	AA 1602	42-45	CANCELLED
14:20	Fort Lauderdale	jetBlue B6 1612	50-53	CANCELLED
14:30	Orlando	Southwest WN 1641	47-48	CANCELLED
14:50	Chicago	UNITED UA 1650	56-59	CANCELLED

como 900 pasahero. E tres vuelonan cancela aki tabata sold-out, como cu ta pasaheronan cu a viaha pa Pasco.

Atake riba Venezuela

Caos na Aeropuerto di Bogota ora cu vuelonan pa Aruba a keda cancela



ORANJESTAD (AAN): E cancelacionnan di vuelo riba Diasabra no a djis afecta aerolineanan cu ta bin for di Merca of Europa, pero tambe vuelonan di paisnan Centro Americano y di Latino America.

E potret aki ta muestra e caos cu tabatin na Aeropuerto El Dorado na Bogota, Colombia, ora cu pasaheronan tabata den sala di salida sperando informacion cu nan vuelo pa Aruba lo continua of no. Hecho ta cu vuelonan pa Aruba tabata sold-out, debi cu ta monton di hende ta regresando di Colombia despues di a bay pasa cambio di aña, y tambe Pasco na e pais.

Pero finalmente vuelonan a wordo cancela, y tur hende a keda sin viaha pa Aruba.

Hopi a cumenza pensa cu scol ta start awe, y nan lo no por haya cupo pa regresa nan isla. Sinembargo como cu Avianca ta un aerolinea cu semper tin avion disponible, a dicidi cu envez di e 2x vuelo pa dia for di Bogota pa Aruba, riba Diadomingo nan a pone 4 vuelo. Dos vuelo extra a ser aña di pa trece tur hende di Bogota, esta vuelo AV-5052, y tambe vuelo AV-5054. Pues tur hende lo tey cla pa cumenza traha awe, y tambe pa muchanan bay scol entrante Diaranson 7 di Januari 2026.

Mas atardi, a haya informacion cu toch Avianca a cancela un di e vuelonan di Diadomingo. Pues e ora ta en total 3 vuelo for di Bogota a yega Aruba.

ARUBA
Beach Club Resort

since 1977

We Are HIRING!

The Aruba Beach Club Resort is a world-class timeshare resort that, as the first of its kind in the Caribbean, provides Aruban-style excellent service to its members and guests.

Open positions:

- **Houseman**
- **Public Area Attendant (M)**
- **Security Guard**
- **Front Office Reliever**
- **Housekeeping Supervisor**

Benefits:

- **Attractive Salaries**
- **Year-end Bonus**
- **5-day workweek (40 hours per week)**
- **Life & Health Insurance**
- **Dental & Vision Insurance**
- **Company & Personal savings plan program**

Submit your application, including cover letter and resume, via email to hrmanager@arubabeachclub.net or personally at our Human Resources office at J.E. Irausquin Blvd. 53, Monday to Friday, from 9:00 am to 3:00 pm. For more information, call us at 524-3017 or 524-3016.

El a huramenta na Caracas como
President di Venezuela

Delcy Rodriguez ningun momento a huy pa Rusia



CARACAS: Riba Diasabra un rumor a cuminsa circula cu vice-president Delcy Rodríguez lo a huy di Venezuela, y a sali rumbo pa Rusia.

Algun hende a kere e noticia aki y a cuminsa plama e informacion aki. Pero observadornan mesora ta mira cu e historia ey ta hopi dudoso. Con e lo huy siendo cu e espacio aereo riba y rond di Venezuela ta hermeticamente cera.

Mientras tanto, Kremlin na Rusia a desmenti tur version cu Delcy Rodríguez a huy

pa Rusia. E corant The New York Times a bira e prome riba Diasabra pa confirma cu e ta keto bay na Venezuela.

Poco despues Delcy a aparece den reunion cu demas miembronan di gabinete, incluyendo Diosdado Cabello, Tarek William Saab, y Padrino Lopez, unda e ta exige pa Merca duna prueba cu Nicolas Maduro ta na bida, y tambe ta exige pa Merca pone Maduro den libertad inmediatamente.

Mas laat, Delcy Rodríguez a huramenta como President di Venezuela. Tur esaki a socede riba suelo Venezolano mes. Pues e rumornan cu a circula cu el a huy pa Rusia, no ta basa riba realidad.

Atake riba Venezuela

Bukele a uza social media pa haci bofon di Maduro despues di a wordo captura



SAN SALVADOR: President di El Salvador, Nayib Bukele, a reacciona riba e captura di Nicolas Maduro, recordando tur e insultonan cu e president di Venezuela a yega di dirigi riba dje den pasado.

Riba Instagram, Bukele a publica un carousel cu ta muestra e menazanan di e lider chavista cu su realidad actual como detenido di husticia Mericano.

E contenido cu e mandatario Salvadoreño a pone, ta cuminsa cu un video di Maduro unda e tabata lastra Bukele uzando palabranan fuerte y sigurando cu “nada

lo separa pueblonan di El Salvador y Venezuela”.

“Ningún mequetrefe, ningún pelele del imperialismo, como el tal Bukele, va a separar a los pueblos... Bukele, el que se mete con nosotros se seca,” ta loke Maduro tabata bisa na spaño.

Sinembargo, e di dos parti di e carousel di Bukele a muestra un realidad diferente. Ta trata di e potret publica pa president Donald Trump riba social media, unda ta mira Nicolas Maduro deteni bao vigilancia abordo di e barco USS Iwo Jima.

Atake riba Venezuela

Momento cu Nicolas Maduro a yega aeropuerto militar na New York



NEW YORK: Nicolas Maduro a baha Diasabra anochi cu man na boei, di e avion militar Boeing 757 cu a transport’e pa New York, hunto cu e personal di custodia cu a acompañ’e.

E mandatario Venezolano a yega na Base di National


Guard na area di Stewart, cu ta un aeropuerto militar den parti nort di New York, unda decenas di agentenan di diferente agencia federal, e.o. FBI, Drug Enforcement Administration (DEA) tabata sperando riba dje, na un temperatura di -2 grado Celsius.

For di eynan, a traslada Nicolas Maduro den helicopter pa Metropolitan Detention Center (MDC) cu ta un prison federal situa den distrito di Brooklyn.

Na su yegada, a hasta pone riba un stoel y asina a saca potret hunto cu ne.

Cuerpo Policial

Chauffeur a dal brommer di polis y e pasahero a saca un arma di candela



ORANJESTAD (AAN): Diasabra durante control, Polis Motorisa a wak un auto sospechoso na altura di un cas na den Laurens Costenstraat. E agente di Unidad Motorisa acerca e auto y diripiente, e chauffeur a dal brommer di e

agente y e pasahero a saca un arma di candela.

Mesora e agente a pidi refuerzo y asina a cuminsa cu un buskeda den vecindario. Na altura di RCA ta topa cu e homber cu a saca e arma di candela y a deten’e. Polis a

confisca un arma di candela.

- Ocho detencion pa maneha bao influencia di alcohol Departamento di Trafico y Unidad Motorisa a haci control prome durante y despues di Parada di Flambeau.

Departamento di Trafico a controla na comienso di e Parada di Flambeau pa loke ta trata e papelnan di auto como tambe rijbewijs valido.

Unidad Motorisa a haci control na diferente camindanan strategico durante parada.

Den total a detene 8 chauffeur pa maneha bao di influencia di alcohol.

Cuerpo Policial ta haci un apelacion un biaha mas pa no maneha auto bao influencia di alcohol y Usa Bo Amigo Responsabel.

Atake riba Venezuela

Na Aruba ya caba tin hende canando cu Shirt cu imagen di Maduro captura



ORANJESTAD (AAN): Por a mira algun di nan ya caba Diasabra anochi durante Parada di Flambeau na Oranjestad. Hendenan cu T-Shirt riba cual tin e imagen di e dictador Nicolas Maduro captura abordo di e barco USS Iwo Jima,

wardando transporte pa bay rumbo pa prison di Brooklyn na New York.

E potret di Maduro cu su man na boei, cu wowonan tapa, cu earprotector na cabez, y cu un full body pak di Nike bisti (oficialmente

yama 'Nike Tech Fleece'), a wordo divulga Diasabra door di President Donald Trump como prueba cu nan tin Maduro.

E potret a circula rond mundo, y mientras algun a bay traha video anima di e potret ey (unda ta mira Maduro baliando of hasta tocando na aparato di DJ), por a nota cu na Aruba a dicidi na traha T-shirt di dje.

No ta esey so, sino cu diripiente e interes pa e Nike Tech Full-Zip Windrunner Hoodie aki a bira viral. Interes den e paña aki aumenta drasticamente ora cu e potret a plasma rond mundo cu Nicolas Maduro bisti den dje. Hopi hende a cumenza busca in-



formacion di e paña aki, djis pa curiosidad. Su prijs riba e website di Nike ta di \$260.

Segun Google Trends, e buskeda pa e Nike Tech Full-Zip Windrunner Hoodie aki

a subi drasticamente riba Diasabra atardi y Diasabra anochi. Riba Diadomingo tin indicacion cu hendenan a cumpra esaki y el a sold-out temporalmente.

Cruz Cora + Aruba

ALGEMENE LEDENVERGADERING

01.19.2026

Dialuna, 19 di januari, 2026

6pm- 7.30pm

Pedro Gallegostraat 14, Dakota

Agenda

- Apertura
- Aprobacion notulen ALV 9 december, 2024
- Anuncionan
- Aprobacion "Strenghtening Volunteer Engagement and Retention" a Strategic Action Plan
- Aprobacion Jaarrekening 2024
- Aprobacion Budget 2026
- Palabra liber
- Final



Documentonan lo ta na oficina pa revision entrante 5 di januari, 2026

President Macron di Francia a celebra caida di Nicolas Maduro



PARIS: President di Francia, Emmanuel Macron a duna declaracion despues di e atake militar di Merca contra Nicolas Maduro riba Diasabra 3 di Januari 2026.

Via di social media, e mandatario frances no a djis celebra e fin di regimen di Nicolas Maduro, sino tambe cu el a identifica claramente ken mester lider a e proceso politico, esta Edmundo González Urrutia.

Pa e president di Francia, e salida di Maduro (despues

di a wordo captura door di militarnan Mericano) ta representa un acto di husticia pa un pais di cual su libertadnan a wordo sistematicamente vulnera.

"Pueblo Venezolano awor ta liber di e dictadura di Nicolas Maduro y nan por ta alegre," e president Frances a indica. "Door di gara poder y trapa riba libertadnan fundamental, Nicolas Maduro a destrui gravemente e dignidad di su mesun pueblo."

Atake riba Venezuela

Asina bunker y vehiculonan militar a keda na Fuerte Tiuna



CARACAS: E prome atakenan di Merca a socede riba avion of helicopternan di lanta vuelo, pa asina e Helicopternan Mericano por a drenta



sin problema.

Uno di esnan cu a wordo ataca ta e Fort conoci como 'Fuerte Tiuna' cu ta cas di e asina yama 'Batallón Ayala'. Explosionnan fuerte a wordo registra na e Fort aki, y riba e potretnan por mira resultado di e bomnan di precision cu a wordo uza. Asina por mira con Batallón Ayala a keda.

E canal CBS News a raporta cu ta na Fuerte Tiuna e militarnan a bin captura Nicolas Maduro. Pues ta aki ta unda e tabata drumi, y infiltrantenan a duna Merca informacion detaya di e lugar aki unda e tabata kedando.

Vehiculonan destrui cu impacto direct, of cu splinternan di bom a dal y perfora nan. Tambe tin un bunker grandi den pida sero scondi, cu a wordo destrui door di bomnan cu ta penetra concrete.



Ora cu a bay revisa e area, oficialnan militar riba e Fort aki cu a keda herida.



Atake riba Venezuela

Delcy Rodriguez a existi prueba cu Nicolas ta bibe pero ora famianan a pidi esey cu presonan politico ta bibe e tabata keda mudo



CARACAS: E vice-president di Venezuela, Delcy Rodriguez a hiba palabra y bin cu e storia cu e unico president di nan ta Nicolas Maduro. El a bisa esey despues cu Maduro a wordo captura door di militarnan Mericano den un atake di Diasabra marduga.

"Nos ta existi inmediatamente e liberacion di president Nicolas Maduro y su casa Cilia Flores, unico president di Venezuela,"

Rodriguez a bisa den un transmission nacional via TV y radio.

El a hasta existi pa Merca manda pa nan un prueba cu Nicolas Maduro ta bibe.

Esaki a causa un ola di reaccion di ciudadanonan Venezolano. Pasobra di hopi tempo, comunidad ta rogando Gobierno pa duna nan, como famia di presonan politico, un prueba cu nan ser keri ta bibe. Pero nunca Delcy Rodriguez a

duna nan un contesta.

Pero awor si... core existi di Merca un prueba cu Nicolas Maduro ta bibe. Esaki a socede mas despues den dia, ora cu President Donald Trump a publica un potret unda ta mira Nicolas Maduro abordo di e barco USS Iwo Yima, cu un boter di awa den man, cu wowonan tapa, cu tapa special pa defende su oido, y cu un Nike Sweatshirt bisti.

New York Times ta raporta 40 morto debi na bombardeonan inicial na Venezuela



NEW YORK: E corant The New York Times na Merca a raporta cu por lo menos 40 persona a muri den Diasabra marduga durante e atake inicial Mericano riba instalacionnan militar na Venezuela. Nan ta indica cu esnan morto ta inclui personal militar y tambe hende civil.

President Donald Trump na Merca den entrevista cu Fox News, a bisa cu ningun soldat Mericano a muri, aunke si tin algun cu a keda herida. General Dan Caine kende ta president di Joint Chiefs of Staff a bisa cu

algun helicopter Mericano a wordo ataca, pero no a wordo afecta gravemente y por a sigui bula, y cu tur avion Mericano a regresa cas.

Na Venezuela a raporta di un persona civil cu a muri na Catia La Mar, parti pabao di Aeropuerto di Caracas. Un atake a impacta un compleho di apartamento di 3 piso, y a basha un muraya pafu. E atake a mata Rosa Gonzalez di 80 aña, y a herida gravemente un persona mas.

Atake riba Venezuela

Merca a uza mas di 150 avion den e atake riba Venezuela

CARACAS: Hendenan a cuminza tende avion ta bula ya for di 1:45 am caba. Pero pafo no tabata mira nada. Avionnan kizas tipo stealth, of esnan bulando riba nubianan, no tabata visibel di abao.

Segun president di Joint Chiefs of Staff, General Dan Caine a describi e operacion pa captura president Nicolas Maduro di Venezuela, como un operacion extenso y meticulosamente planea cu a hiba varios luna di preparacion y oranan largo di ehecucion riba teritorio Venezolano.

Den un conferencia di prensa na Florida, General Caine a describi e mision como un colaboracion den cual tur ramo di Forzanan Arma y agencianan di in-



teligencia a participa, y a rekeri varios luna di preparacion. Esaki a inclui e vigilancia di Maduro pa “compronde con e ta move, unda e ta biba, unda e ta vi-aha, kico e ta come, kico e

ta bisti,” Caine a splica.

Algun tempo pasa a haya informacion cu CIA a instala un aparato chikito na Venezuela durante lunanan di verano, pa vigila di cerca e actividadnan di Maduro.

Ultimo ora di Diabierna anochi, segun General Caine, mas di 150 avion a lanta vuelo for di 20 diferente base militar na tera y di portavion na lama, den henter hemisferio occiden-

tal. Entre nan tabatin Helicopternan cu a transporta un forza elite di bay captura Maduro, y nan a cuminza bula rumbo Venezuela apenas 30 meter halto riba superficie di lama.

El a confirma cu e helicopternan a drenta Venezuela despues cu a caba di haci bombardeo, y nan a yega na e compleho di Nicolas Maduro pa 2:00 am. E esfuerso pa captura Maduro y su casa a rekeri multiple “enfrentamento di defensa propio”, ya cu Venezolanonan a tira riba nan. A sali for di Venezuela bek banda di 4:29 am.

Segun General Caine, si acaso un componente so di e mision aki a faya, e lo por a trece na peligro henter e mision.

Aeropuerto a reanuda operacionnan despues di cancelacionnan di vuelo



ORANJESTAD (AAN): Diasabra Aeropuerto Internacional Reina Beatrix a informa cu nan a anticipa cu e operacionnan di aeropuerto lo ta operacional normal, riba diadomingo 4 di Januari 2026.

Diasabra, for di 58 vuelo di entrada y salida cu tabatin programa, a cancela un total di 44 vuelo, incluyendo 38 vuelo di Merca y 7 vuelo di otro paisnan. Aeropuerto di Aruba ta trahando den coordinacion estrecho cu partnernan di aerolinea y autoridadnan di aeropuerto pa acomoda e pasaheronan afecta na un manera sigur y eficiente. Como resultado, aeropuerto

ta anticipa un dia operacional mas ocupa cu normal riba diadomingo, ya cu diasabra originalmente tabata anticipa pa ta un dia di biahe di gran cantidad di pasahero (“Super Saturday”), cu 58 vuelo y aproximadamente 15.000 pasahero programa pa procesa. Ta conseha e pasaheronan cu vuelo confirma pa yega aeropuerto na tempo pa nan salida programa. Medidanan di control di fluho di pasahero lo keda na vigor pa sostene operacionnan safe, sigur y ordena.

Pasaheronan cu nan vuelonan a keda cancela diasabra, como tambe biaheronan sin un vuelo confirma, a wordo

conseha encarecidamente pa no presenta na aeropuerto y pa tuma contacto cu nan aerolinea directamente pa rebooking y areglonan di biahe.

Aeropuerto di Aruba lo sigui vigila e situacion di cerca y duna actualisacion manera cu ta apropiada. Ta curasha e pasaheronan pa check directamente cu nan aerolinea y bishita www.airportaruba.com pa haya e informacion di vuelo mas actualisa.

Aeropuerto di Aruba ta gradici tur e partnernan di aeropuerto di antemano pa nan cooperacion y sosten continuo mientras ta traha pa un regreso sigur y ordena na normalidad.

Crusero ‘Valiant Lady’ di Virgin Voyages a cancela nan bishita na Aruba y Curaçao



ORANJESTAD (AAN): Awe Dialuna, tabatin planea pa e isla aki ricibi bishita di e crusero ‘Valiant Lady’ di Virgin Voyages cruise line. Sin embargo debi na e situacion na Venezuela, ya caba desde Diasabra nan a tuma e decision cu ta cancela e bishita di Dialuna 5 di Januari 2026 na Aruba, y e bishita di Diamars 6 di Januari 2026 na Curaçao.

“Debi na e evolucion di e situacion na Venezuela, a haci algun ahuste cuidadoso na e ruta pa e mihor interes di e pasaheronan y tripulacion,” nan a indica den un boletin. E barco Valiant Lady tin capacidad

pa 2.770 pasahero.

Envez di Aruba, awe nan lo mara na capitania Bridgetown di Barbados. Mañan envez di Curaçao, nan lo nabega pa capital Castries na isla di St. Lucia.

Pero nan bishita na St. John’s (Antigua), y Philipsburg (St. Maarten) lo keda sin cambio. Tur pasahero cu tabatin excursion gebook caba pa Aruba of Curaçao, a wordo cancela automaticamente y placa a ser debolbi.

Awe lo tin un otro crusero cu si ta drentando waf di Aruba, esta “Europa 2”, cu tin capacidad pa 516 pasahero.

Atake riba Venezuela

Venezolanonan feliz a subi caya pa celebra



CARACAS: Pueblo di Venezuela a cumenza sinti Diasabra mes un aire di alivio ta drentando den tur skina. Nan ta nota cu militarnan ta nervioso y span-ta. Pueblo riba su mes a

cuminza ta celebra.

Tin informacion no-con-firma cu algun di nan a has-ta subi borchinan cu poster di Nicolas Maduro, pa asina destrui esaki. Tambe tin indicacion inoficial cu

a destrui algun simbolo di tempo di fayecido Hugo Chavez.

Pero hecho ta cu Diasabra atardi, tabatin basta hende riba caya, aunke transporte publico tabata

practicamente paraliza na e pais.

Riba Diadomingo cu tabatin mas transporte publico, por a nota cu mas hende na forma masivo a subi caya pa celebra. E ta un mensahe fuerte pa Chavistanan nota cu pueblo ya no kier nan mas. Nan kier pa e resto di e clan, incluyendo Diosdado Cabello tambe wordo deteni. Nan ta pidi pa detencion tambe di fiscal general Tarek William Saab, y Ministro di Defensa, Padrino Lopez.

Di e forma aki, ciudada-

nonan ta sinti cu porfin nan lo por tin libertad atrobe. Libertad di expresion y sin miedo cu nan lo por wordo gara, deteni, of asesina pa comete e acto di protesta y celebracion asina riba caya.

Den diferente area di Venezuela por a tende hendenan gritando di alegria, y cu nan ta spera cu di berdad tur gobernante Chavis-ta ripara cu pueblo kier e cambio, y mihor nan mes empaketa maleta y desaparece di e pais.

Cancelacion di vuelo preocupando hopi Turista na Aruba



ORANJESTAD (AAN): E atake di Merca riba Venezuela pa bay captura Nicolas Maduro, a bin net ora cu mayoria vuelo saliendo di Aruba ta yen-yen di hendenan cu a bin pasa Pasco y cambio di Año Nobo.

Riba Diasabra, ta monton di vuelo pa y for di Aruba a wordo cancela. Awendia pa bo rebook riba otro vuelo, ta haci esaki principalmente via Internet of e app di Aerolineanan.

Pero ya caba ta drentando informacion di varios bishitante na Aruba cu ta hayando problema pa por obtene cupo riba un siguiente vuelo.

Un turista cu a keda afecta Diasabra debi cu su vuelo cu jetBlue a wordo cancela, ta bin realiza cu e siguiente vuelo cu e aerolinea ta ofrece cupo pa nan, ta te Diamars 13 di Januari 2026.

E turista a bisa cu nan ta cuatro pasahero, y tambe un baby cu ta bay den scochi. Pero jetBlue a indica cu e siguiente cupo pa 4 persona ta

te dia 13 di Januari.

E turista a skirbi riba social media, cu nan a trata tur e otro aerolineanan pa bula cualkier destinacion pa Merca pa asina por sali di Aruba, pero no ta hayando nada. Nan no sa kico pa haci, pasobra nan tin di bay bek nan pais pa bay bek trabao, y tambe bay scol.

Esaki ta un di e motibonan pakico semper pasaheronan tin di viaha cu Aseguro di Viahe pa por yuda cubri tur gastonan imprevisto cu ta presenta. Pero tin e pensamiento cu ora cu e espacio aereo habri bek, cu aerolineanan lo por pone extra vuelo djis pa yuda saca pasaheronan cu ta stagna aki.

Hecho ta cu aerolineanan ainda no por a duna informacion concreto, te ora cu espacio aereo habri. Y si acaso esaki habri, y nan tin bon bista di cantidad di pasahero stagna, nan por manda mas avion (of uza avion mas grandi, wide-body) pa yuda trece pasaheronan stagna den Caribe.

Atake riba Venezuela

Senador Bernie Sanders bisando cu Trump no tin derecho di start guerra y ataca Venezuela

WASHINGTON: Senador Bernie Sanders, kende den pasado a yega di participa den eleccion presidencial na Merca, a emiti un declaracion riba Diasabra mes pa bati alarma riba loke Gobierno Mericano a bay haci na Venezuela. El a declara lo siguiente:

“Donald Trump un biaha mas a demostra su desprecio pa Constitucion di Merca y estado di derecho. President di Merca NO tin derecho di hiba Merca unilateralmente den un situacion di guerra, ni sikiera contra un dictador corrupto y brutal manera Maduro. Merca NO tin derecho, manera cu Trump a declara Diasabra mainta, pa “dirigi” Venezuela. Congreso tin di aproba inmediatamente un resolucion pa stop e operacion militar ilegal aki, y reafirma su responsabilidadnan constitucional.”

E atake di Trump contra Venezuela lo pone cu Merca y mundo lo bay ta menos sigur. E violacion serio aki



di derecho internacional ta duna luz berde pa cualkier pais riba e planeta aki cu ta desea na ataca otro pais pa apodera di nan recursonan of cambia nan gobierno. Esaki ta un logica horibel di e forza cu Putin a uza pa hustifica su atake brutal contra Ucrania.

Trump y su Gobierno a bisa varios biaha cu nan kier rebiba e Doctrina Monroe, bisando cu Merca tin derecho pa domina e asuntonan di e hemisferio. Nan a papia abiertamente di controla e reservanan petrolero di Venezuela, cu

ta esun mas grandi na mundo. Esaki ta imperialismo puro y duro. E ta recorda hende di e capitulonan mas scur di e intervencionnan Mericano na Latino America, cu a laga un legado teribel atras. E lo ta y mester wordo condena door di mundo democratico.

Trump a core campaña pa president riba un plataforma di “America First”. El a bisa di ta e “candidato pa paz”. Net aworaki cu 60% di Mericanonan ta bibando cu salario cu apenas nan por sobrevivir, cu un sistema di salud ta colapsando, y cu ciudadanonan no por cumpra un cas, y unda cu Inteligencia Artificial ta menaza miyones di empleo, e momento a yega pa president enfoca riba e crisis cu Merca ta enfrentando y stop cu e aventura militar den exterior.

Senador Bernie Sanders a finaliza bisando: “Trump ta fracasando den su trabao pa “dirigi” Merca. E no mester ni purba di bay “dirigi” Venezuela.”

Tradición
ta conecta nos

SETAR
Sponsor Oficial

Parada di Flambeau cu yen di ambiente pero publico tabata visibelmente menos

ORANJESTAD (AAN): Diasabra anochi e mecha di Parada di Flambeau a ser cendi, y pa exactamente 8:00 pm e parada a start. SMAC hunto cu Setar NV a cende e prome flambeau pa asina esaki start. Esey a socede den presencia di president Darren van Ommeren di SMAC, como tambe demas miembronan di Cuerpo Policial, y personal di Setar NV. Alto Comisario Arnhem tambe tabata presente.

SMAC a indica cu e cantidad di participante den Parada di Flambeau oficialmente ta 10.779 persona, cu a balia di comienso te fin riba caminda. E grupo Avanti cu tabata planea pa bay topa

como Lastlap, na final no por a sigui debi cu den reglanan di Carnaval, pa Parada di Flambeau no tin Lastlap.

En general, hendenan a goza di e ambiente y por a mira riba cara di participantenan cu nan ta gozando sin fin. Pero toch tin hopi hende cu a comenta cu nan por a mira hopi espacio na banda 'bashi', y hasta via transmision di TV den Vondellaan por a mira esaki.

Pero den Lloyd G. Smith Boulevard tambe a mira algo parecido. Leu-leu tin 'kluster' di publico aglomerando riba otro. Pero yegando na parti mas na final, casi no tabatin hende para na rand di acera mes. Ambiente si tabata bon.



Participantenan di Fakkel cantando cu bos halto

ORANJESTAD (AAN): E tabata algo hopi notabel Di-asabra anochi durante Parada di Flambeau teni na Playa. Bandanan musical tocando musica conoci, y participantenan ta canta hunto cu nan, den loke Hulandesnan lo bisa “uit volle borst zingen”.

Y esey ta algo cu hopi hende a nota durante e Fakkel di 2026. Cantamento den publico y esaki tabata muestra cu e participantenan tabata gozando un mundo di e evento.

Aki por mira mas di e actividad di Parada di Flambeau di Diasabra anochi.



ARUBA Programa Carnaval 72

Diabierna 9 Januari 2026 - Lugar no-anuncia ~ 6:30 pm
Calypso Roadmarch Contest Infantil Hubenil
Diasabra 10 Januari 2026 - Lugar no-anuncia ~ 6:30 pm
Eleccion Reina Hubenil y Eleccion Reina Adulto
Diadomingo 11 Januari 2026 - Lugar no-anuncia ~ 7:00 pm
Eleccion Reina Infantil y Eleccion Reina Grandi
Diabierna 16 Januari 2026 - Lugar no-anuncia ~ 7:00 pm
Festival di Tumba Infantil y Hubenil
Diasabra 17 Januari 2026 - Balashi Beer Garden ~ 7:00 pm
Festival di Tumba
Diadomingo 18 Januari 2026 - Oranjestad ~ 2:00 pm
Parada di Fantasia
Dialuna 19 Januari 2026 - Carnival Village ~ 8:00 pm
Pre-Finals Soca & Monarch
Diamars 20 Januari 2026 - Carnival Village ~ 8:00 pm
Pre-Finals Soca & Monarch
Diaranson 21 Januari 2026 - Carnival Village ~ 8:00 pm
Pre-Finals Soca & Monarch
Diabierna 23 Januari 2026 - Lugar no-anuncia ~ 8:00 pm
Night of the Hit Makers
Diabierna 30 Januari 2026 - Oranjestad ~ 10:00 am
Parada Escolar Oranjestad (Scolnan preparatorio y Basico)
Diabierna 30 Januari 2026 - Lugar no-anuncia ~ 7:00 pm
MUSICA Fundraising Event
Diasabra 31 Januari 2026 - Bubali/Noord ~ 3:00 pm
Parada di Mucha na Noord
Diasabra 31 Januari 2026 - Carnival Village ~ 7:00 pm
Aruba Soca Monarch Grand Final
Diadomingo 1 Februari 2026 - Oranjestad ~ 2:00 pm
Parada di Mucha na Oranjestad

E ambiente di Fakkel for di comienso te cu fin

ORANJESTAD (AAN): E ambiente tabata for di comienso te cu fin. Por a comproba cu e participantenan a goza inmensamente, y sigur lo recorda con dushi nan a pasa. Algun mirones a bisa cu cierto grupo tabata laf, pero e



participantenan sin embargo lo keda insisti cu nan a pasa bon. Y esey ta e principal motibo pa nan participa... esta pa nan pasa bon y goza un mundo.

Palabra di pabien pa tur grupo di Carnaval cu a traha duro y a goza di nan exito di Diasabra anochi den cayanan rond di Oranjestad.



Net riba Aña Nobo marduga...

Candela a destrui e misa iconico di Vondelkerk na Amsterdam

AMSTERDAM: Ora cu na aña 1870 a surgi e necesidad pa construi un misa den cercania di Vondelpark na Amsterdam, tabata e arkitekto Pierre Cuypers cu a bin cu un mapa di construcccion. E tereno riba cual e kier a construi e misa, tabata e tempo ey caba su propiedad. Esey a dun'e mas libertad pa diseña e contour di e edificio di misa y hasta duna e area direct rond di dje un forma special, y asina el a pone e misa aki den su curason. Construcccion a cuminsa na 1872, y finalmente a wordo inaugura na 1880.

E isla a wordo posiciona como un isla chikito oval, y a bira e prome misa independiente na Amsterdam desde edad medio, y e caya straight Vondelstraat a wordo pasa na ambos banda.

Asina desde 1880 te cu 1977, e basilica di cruz aki a wordo uza como e Iglesia Catolico Sagrado Curason di Hesus. E parti mey-mey a sirbi como sala di concierto, y e areanan rond dje a wordo gehuur como oficina.

Un candela na aña 1904 a pone cu e toren y e dak a bay perdi. E toren a wordo reconstrui na un forma cambia segun diseño di Joseph Cuypers, kende ta yiu homber di Pierre. El a keda sirbi te 1977 como misa. El a wordo restaura na e.o. 1985, 1999, y tambe na 2004. El a obtene status di monumento Huelandes na 1970.

Vondelkerk a bira un misa iconico, admira pa su diseño neogotico, y potretnan di dje a wordo saca di tur banda, y ta un lugar cu bishitantenan di Amsterdam ta saca tur dia su potret y video.

Pero riba Aña Nobo marduga, dia 1 di Januari 2026, banda di 1:00 am un candela a cuminsa den e toren di misa. E candela aki a plama, y den un rato alarmanan tabata sona



cerca monton servicio di Brandweer na Amsterdam.

E candela tabata manda vlamnan grandi na halto, y chispa di candela tabata zwaai den tur direccion. Esaki a pone cu Polis a dicidi pa evacua decenas di cas den e area directo, debi cu e chispanan aki tabata plamando den biento. Habitantenan a core uza un Yogastudio eybanda como shelter e momento ey.

Na prome instante a cuminsa teme cu e edificio por bay basha den otro. Sinembargo e murayanan di e misa a keda para y no a sucumbi. Bomberonan a haya hasta yudanza di team di boluntarionan, mientras cu mirones a keda wanta basta leu, pero nan a keda mira cu yen spanto, con nan tan stima Vondelkerk despues un siglo y mey ta bayendo perdi door di e candela devastador aki.

Alcalde Femke Halsema mes a declara cu Amsterdam a perde un di su monumentonan mas intimo. El a splica cu e misa aki tabata e curason cu ta bati di e bario. "Un compañero silencioso ora di crece, biba, y bira di edad grandi."

Bomberonan a lucha pa 10 ora largo pa trata na domina, y pa seguridad a desconecta coriente pa e area, y esaki a afecta 90 cas den e sector. Finalmente te poco despues di 11:00 am, Brandweer a informa oficialmente cu nan tin e candela bao control. Parti di e toren mey-mey, y e dak a basha bin abao. Ningun hende a resulta herida den e incendio grandi aki.

Ora cu mainta a habri a mira con destrui e lugar a keda. Aunke tin speranza cu lo por bay drecha esaki bek, y pa tal motibo mes varios habitante cu ta biba rond di e misa, a cuminsa



cu un accion di recauda fondo. Riba diferente website di crowdfunding, a cuminsa cu accion di donacion pa acumula placa pa drecha Vondelkerk atrobe. Un di e iniciativanan aki a bin di Stichting Hart voor het Vondelpark. Nan ta haya cu e misa aki no por wordo elimina di historia, cultura, y identidad di Vondelpark y di Amsterdam.

E doño tambe di e misa awor, Stadherstel Amster-

dam, a cuminsa cu un accion di recauda fondo. Expertonan a muestra caba cu e trabao lo bay ta costa den miyones di Euro pa por wordo haci. Pero ainda no por cuminsa, debi cu keto bay ta haciendo un investigacion pa purba haya sa e causa. Aunke hopi hende tin den nan cabez caba, cu ta klapchi y vuurwerk di cambio di aña lo a hunga un rol aki.





RESULTADO DI SORTEONAN PA CORTESIA DI CADENA ALEXANDER

— Diasabra 3 Januari 2026
— Diadomingo 4 Januari 2026

DIARIO	KORSOU	Lotería Santo Domingo	CATACHI	ZODIAC	LUCKY 3
Diasabra 1562 5263 3027	Diasabra 8441 3476 9761	Diadomingo Anochi No tin sorteo	Diasabra (Meridia) 3301 3685 8032 X3	Diasabra (Anochi) 5394 7878 6888 FP	Diasabra (Meridia) 6922 Piscis
Diadomingo 6933 2494 3532	Diadomingo 5636 3020 4242	SUPER 4	Diasabra 3560	Diadomingo (Meridia) 1118 3514 9467 FP	Diasabra (Anochi) 307 X2
Diasabra (Meridia) X2 1514	Diasabra (Anochi) X2 5343	OFF	Diasabra (Meridia) 1460	Diasabra (Anochi) 1669	Diasabra (Anochi) 693 X2
Diadomingo (Meridia) X2 4766	Diadomingo (Meridia) 4535	LOTTO DI DIA	Diasabra 04-06-08-26-30	Diadomingo 04-05-11-12-27	Siguiente jackpot: 64.000 Florin

RESULTADO

— Resultado di Diasabra 3 Januari 2026 —

03 05 08 22 23

Free Letter: **G**

Joker **14**

1er Premio: Tin 0 ganador
2do Premio: Tin 0 ganador di Match 4+
3er Premio: Tin 5 ganador di Match 4
4to Premio: Tin 194 ganador di 12 Florin

Siguiente sorteo: 7 Januari 2026
Premio di jackpot: **Afl. 160.000,-**

BUSCA PALABRA

O E D U W O I C O O I S
D R N O A I H E A L N M
E S N B A B C D O E H E
S X O P I E P O B B S C
I E P O T R A E O H N H
M O R L B N L A R S L A
V R E B O R K B O O L R
K I I E U S E B T N B A
M A E C O O I D O I B G
T R O R E E E O N D D A
E F O I D D N R N O O P
W F L O W E R B E D D K
V U U R W E R K S T O V
O R I T N P O L V O P M

Forki Telep Sucu Tayo
Cuchiu Sker Salo Scoter
Cuchara Tenedo Peper Conchi

Discusion na Aeropuerto CUR

WILLEMSTAD: Vuelo di Avianca pa Curacao tambe a cancela riba Diasabra, y aki pasaheronan a start un discusion fuerte cu personal di e Groundhandling, kendenan realmente no tabatin mas informacion pa duna nan, como cu decision a ser tuma door di Avianca na Bogota.

E discusion a bira fuerte y dado momento a hasta menaza di sali fo'i man.



Hari Un Tiki

E nucha chikito Panchito a drenta cas, y a cana bay cerca su mama, y puntr'e: —“Mami, mami, ta kico abo tin den e barica?”
E mama a conteste: —“Den mi barica tin un baby cu Papi a regala mi”. Esaki a spanta Panchito hopi y mesora di susto el a core sali bay cerca su Tata kende ta pafo ta cambiando bateria di auto, y a bis'e eyfo mes: —“Papi, papi, por favor, no regala mas baby na mami, pasobra e ta come nan.”

Solucion Anterior

5	2	6	1	4	8	9	7	3
8	4	7	5	9	3	1	2	6
9	1	3	6	2	7	8	4	5
3	9	8	2	6	5	4	1	7
2	6	1	4	7	9	5	3	8
7	5	4	3	8	1	6	9	2
6	8	2	7	1	4	3	5	9
4	7	5	9	3	6	2	8	1
1	3	9	8	5	2	7	6	4

Difficulty: ★★★★★

2-3

EMERGENCIA NA ARUBA

Dialuna 5 Januari 2026

DOCTER NA WARD

SAN NICOLAS:

Pa San Nicolas, Docter lo ta na H.A.P. ImSan.
Docter tey for di 6'or di anochi te 10'or di anochi.

ORANJESTAD:

Pa Oranjestad, Docter lo ta na Huisartsenpost H.A.P. na Hospital. Docter tey di 6:30 pm te cu 10:30 pm.

BOTICA NA WARD

PARIBA DI BRUG:

Botica 4 Centro Medico
Bernhardstraat 55
Telefon 584-5794

PABAO DI BRUG:

Botica Santa Cruz NV
Santa Cruz 54-A
Telefon 585-8028



ALMANAC



**Bahada
y salida
di solo
na Aruba**

— 5 Januari 2026
Solo ta baha: 6:28 p.m.
— 6 Januari 2026
Solo ta sali: 7:03 a.m.



**Lista di
Crusero
di bishita
na Aruba**

—Dialuna 5 Jan. 2026:
Europa 2:
(08:00 - 18:00)
Virgin Valiant Lady:
(cancelled)
—Diamars 6 Jan. 2026:
Seabourn Ovation:
(07:00 - 21:00)
—Diaranson 7 Jan. 2026:
Caribbean Princess:
(09:00 - 22:00)
Brilliant Lady:

DIARIO

Loke Tempo ta Mostra....



•• Extension di area di presion halto riba Atlantico ta sigui limi- ta desaroyo di mayoria di nubia significante y apart di un awacero pasahero, tempo generalmente seco lo prevalece awe.

•• Biento di pariba entre 12 y 30 km/h, cu rafaga te 50 km/h. Ola modera entre 3 y 5 pia.

For di DIASABRA 8'or mainta te DIADOMINGO 8'or mainta:

•• Temperatura registra na Aeropuerto, Aruba:
—Maximo: 31° C. Yobida: 0.0 mm.
—Minimo: 26° C.

•• Temperatura registra na Westpunt, Aruba:
—Maximo: 31° C. Yobida: 0.0 mm.
—Minimo: 26° C.

•• Temperatura registra na Santa Rosa, Aruba:
—Maximo: 31° C. Yobida: 0.0 mm.
—Minimo: 26° C.

Difficulty: ★★★★★

2-5

Grupo di exilio Venezolano ta boga pa captura di Cabello, Padrino y rumannan Rodríguez

MIAMI: E Organisacion di Exiliadonan Politico Venezolano (VEPPEX) diadomingo a pidi autoridad Mericano pa accelera e captura di funcionarionan halto di e regimen Venezolano cu, segun e organisacion, ta sigui evadi husticia pa supuesto crimennan contra humanidad, traficacion di droga, y corrupcion.

E organisacion a exige e captura di Diosdado Cabello Rondón; Vladimir Padrino López, Minister di Defensa; Delcy Rodríguez, vice presidente ehecutivo, y Jorge Rodríguez, presidente di Asamblea Nacional, kendenan e ta identifica como piezanan clave di e red politico, militar y represivo di Chavismo y kende su libertad continuo – nan a adverti – ta representa un menasa pa democracia, estabilidad regional y



derechonan humano.

E declaracion ta bin despues di e captura, diasabra, di Nicolás Maduro Moros y su casa, Cilia Adriana Flores, pa un comando Mericano na Caracas, un evento cu e organisacion a cualifica como un “momento tan

spera”.

José Antonio Colina, presidente di VEPPEX, a expresa “emocion profundo y alivio” mirando cu e hecho aki ta marca e inicio di e kibra e ciclo di impunidad cu, nan ta afirma, a prevalece durante mas di un decada di represion, vi-

olacionnan sistematico di derechonan humano, crisis humanitario y exilio forza di miyones di Venezolano.

“Esaki ta un mensahe cla: ningun hende ta riba ley, ni sikiera esnan cu a kere cu nan ta intocabel”, asina VEPPEX, un organisacion di exilio Venezolano na

Miami, e ciudad cu ta alberga e diaspora Venezolano mas grandi di Merca a bisa.

Sinembargo, e organizacion a insisti cu no por papia riba husticia completo mientras cu figuranan central di e regimen ta keda sin rindi cuentanan.

Den e contexto ey, el a reitera cu e libertad di Cabello, Padrino López y e rumannan Rodríguez ta mantene structuranan activo di poder, control y represion cu ta impedi un transicion democratico na Venezuela.

Colina urgentemente y cu determinacion absoluto a haci un yamada na Merca y e comunidad internacional pa sigui cu esfuersonan pa captura tur funcionario di alto rango cu, el a sostene, ainda ta evadiendo husticia.

Atake riba Venezuela

Papa Leo XIV a pidi pa reza pa e futuro di Venezuela

CIUDAD VATICANO: Papa Leo XIV a declara riba Diadomingo, cu “e bienestar di pueblo venezolano mester prevalece”, prome cu cualkier otro consideracion, despues di e captura di Nicolás Maduro door di Merca, y a urgi pa garantiza e soberania y estado di derecho na e pais.

“Cu animo yena di preocupacion mi ta sigui e desaroyo di e situacion na Venezuela. E bienestar di e tan stima pueblo venezolano mester prevalece riba tur otro consideracion y induci pa supera violencia y tuma camindanan di husticia y paz,” el a bisa for di e bentana di e Palacio Apostolico despues di a haci rezamento di Angelus.

E pontifice a pone enfasis pa ‘garantiza e soberania di e pais, segura e estado di derecho poni den Constitucion, respeta e derechonan humano y civil di tur hende y cada uno.’

Pero tambe el a duna animo pa traha “pa construi hunto



un futuro sereno di colaboracion, estabilidad, y concordia, cu atencion special pa esnan mas pover cu ta sufriendo debi na e situacion economico dificil” di e pais Sur Americano.

Leo XIV a pidi pa reza pa e futuro di Venezuela y a pidi intercesion di e patrona di e pais, e Birgen di Coromoto, y su dos prome santonan Dr. José Gregorio Hernandez y

Carmen Rendiles, kendenan a wordo canoniza dia 19 di October cu a pasa.

E pontifice Mericano, pero cu nacionalidad peruano tambe pa su añanan como misionero y obispo y gran conocedo di Latino America, a referi na varios ocasion cu e cautela maximo na Venezuela desde cu el a wordo escogi como Papa dia 8 di Mei cu a pasa.

Columna E Sembrado



Dialuna 5 januari. Di dos siman di Pasco di Nacemento año 2025 Ciclo A.

Calendario Liturgico

Lectura: 1Huan 3, 22-4,6;
Salmo: 2;
Evangelio: Mateo 4, 12-17. 23-25;

E pueblo cu tabata biba den tiniebla ta mira un luz grandi. (Mateo 4,16)

Rumannan, pa nacemento tur hende ta pertenece na e reino di scuridad, specialmente paganonan cu nan pensamentonan di scuridad. Dios a yama nos for di scuridad pa drenta den su luz glorioso. Dios a libra nos di poder di tiniebla y a pasa nos pa e reino di su Yiu, pa asina nos tin parti cu e Santonan den su luz glorioso. Nos a ricibi e gracia grandi aki den e Sacramento di bautismo. E luz di Cristo a cuminsa briya riba nos. Un tempo nos tabata den scuridad, pero awor nos ta luz pa medio di nos comunion cu nos Señor Hesucristo. Esaki ta determina di awor padilanti nos comportacion: nos mester biba como yiunan di luz. Hende mester paga tino pa su luz interior no paga; mester cuid’e manera ta cuida su wowo, cu ta e lampi di su curpa. Tur cos cu ta husto, bon y berdad ta fruta di luz y tur sorto di pica ta obra di scuridad. Esnan cu ta riba e caminda di luz por mira dilanti cu confiansa riba e transformacion maraviyoso cu Dios a priminti e hustonan den su reino.

Oracion: Hesucristo luz eterno, lusa mi alma tur dia pa mi keda semper den bo caminda. Amen.

Grupo Centro Pastoral

Parlamentario Eduard Pieters (PPA):

Un Aña nobo, yena cu principio nobo y un futuro cu nos por construi hunto

ORANJESTAD (AAN):

“Bon Aña Nobo, Aruba. Un Aña Nobo ta inicia cu un un pagina blanco, yena di posibilidad, reto y speransa. E ta un momento pa para keto y pa mira futuro cu honestidad, determinacion, perseverancia y curashi,” ta deseo sincero di Eduard Pieters, parlamentario di fraccion di PPA.

“Un aña nobo no ta elimina e pasado, pero e duna nos e oportunidad pa skirbi un miho historia. Un historia unda respet ta gana riba division, unda responsabilidad ta mas fuerte cu indiferencia y unda liderazgo ta sirbi cu integridad. Den e aña cu a pasa, nos a wak cu Aruba tin un pueblo resiliente, cu su hendenan cu a sigui traha, cuida y soña, hasta ora e circunstancianan tabata dificil y desafiante”.

Eduard Pieters ta convenci cu Aña Nobo ta un invitacion pa uni riba principio: honestidad, solidaridad y husticia den tur sentido di palabra. Ta un yamada pa no keda keto, ora e cosnan no ta corecto y pa no perde fe den dialogo y cooperacion. Progreso real ta



nace ora nos scoge pa traha hunto, gobierno, comunidad y ciudadano, cu un vision comun pa bienestar general. Pero tambe ta un momento pa inverti den nos hubentud, pa cuida nos mayornan y pa fortalece confianza entre nos hendenan y nos institucionnan. Ora nos pone dignidad humano den centro di nos decisionnan, nos ta crea un pais mas fuerte y mas husto. “Pa e aña nobo aki, mi compromiso ta firme: traha cu claridad, curashi y respet pa pueblo Arubano. Mi invitacion ta pa tur ciudadano: laga nos transforma reto na oportunidad y palabra na accion. Bon Aña Nobo, Aruba! Laga speransa guia nos paso y laga nos futuro wordo defini pa loke nos construi hunto awe”.

Riba 400 kilo di cocaina confisca na waf di Puerto Rico

SAN JUAN: Oficialnan di US Customs and Border Protection, a confisca como 424 kilo di cocaina cu tabata scondi den e chasis di un trailer di cargo flatbed cu a yega procedente di Santo Domingo, Republica Dominicana. E droga aki riba caya tin un balor di como 6.7 milyon Dollar.

Nan a intercepta y confisca e droga aki riba Bispo di Pasco, esta Diaranson 24 di December na Waf di San Juan. Oficialnan di CBP tabata inspecciona carga cu

a drenta abordo di un barco tipo Roll-on/Roll-off esta MV Kydon, ora cu nan a ripara algo iregular riba e chasis di e flatbed.

Oficialnan a dicidi na haci mas investigacion, y a busca un cacho K9 pa yuda nan, y e animal mesora a duna nan un alerta positivo cu lo tin droga. A cuminsa haci examinacion y descubri droga scondi den e chasis. Esaki a resulta di ta cocaina.

Ningun hende a resulta herida, pero investigacion den e caso ta sigui.


Skina di Ruthy


Sabiduria den nos alegria!

Skirbi pa Ruthy "Lady Ruth" Vrieswijk-Bergen

Shonnan tur, Bon Aña! Cu 2026 colma di salud, alegria, sabiduria y bon beis tur dia!

Mientras nos ta keto bay festehando, awor cu activi-

dadnan carnaval-
esco, nos pen-
samento ta cu
nos bisiñanan
di pazuid den
nan situacion
fastioso y
doloroso. Pa
hopi kizas ta
anunciando
bon y miho tem-



ponan atrobe ayabandanan. Nos tambe a sigui e noticianan den fin di siman encunto kico tur a pasa, na varios di e canalnan di television Mericano y awor mundo henter wardando riba e desaroyonan cu tin cu sigui tuma lugar.

E Poeta den mi, Lady Ruth, a skirbi algo riba melodianan di su curason atrobe, manera ta su costumber, di comparti di su inspiracion cu su pueblo lector cu hopi amor y cariño. Esaki ta nos prome relato semanal den Januari 2026. Di curason nos ta spera cu e cambio di aña a bay bo bon y cu e lo sigui bon cu lesnan y experiencianan nobo pa cada un di nos. Danki na tur cu a manda Lady Ruth bon deseonan riba WhatsApp, Facebook, na telefon y personalmente! Danki y tur bon deseo igualmente pa boso tur!

Danki pa lesa nos relato cu atencion y pasa un bon dia yen di sabiduria den nos alegria! Dios mediante nos lo

por continua skirbi nos relato durante henter 2026 tambe si salud ta permiti naturalmente. Danki na Bon Dios pa cada bendicion cu e lo sigui manda pa cada un di nos. Na Su Number Gloria!

— PENSAMENTO PA Pensa —

Tin pensamiento cu cada pais mes mester soluciona su problemanan

Cu nan tin e gobierno cu nan merece y biba cu ne

Bida complica cu hende na poder di dicta y manda

Den tur sorto di organizacion of instancia manera den nacionnan uni cu mentenan tripi

Esnan na cabes di organizacion- of fundacionan no ta responsabel tur ora y por faya,

Fo'i comienso di mundo tabatin discusion pleito y guerra den famia y entre nacionnan pa tereno pa religion y Dios sa pa kico mas, stroba paz den hopi curason y den cas

Di hopi cu tambe kier mas?

Pakico mete den otro famia den otro cas den otro pais

Cada nacion cu nan mesun raiz, di competencia pa cos

Pa miho arma, miho bom

Miho remedi, miho petroleo, miho kico?

Ki tristo ta cada nacion su Dios, di con pueblo y of mandatarionan asina golos?

Mundo por sigui celebra Pascu y e paz cu nunca mas lo bini?

Profetanan y Poetanan por sigui skirbi cu ink termina den sanger, tocante e orguyo cu no tin fin?

Mentenan mahos cu decisionnan malo tuma

Balansa cu mentenan bunita yen di amor pa bida

Pa e cachonan cu ta hayando mas bon cuida y atencion, di con?

Cacho ta comprende hende

Hende no ta comprende cacho tambe ta un pensamiento cu ta bula den biento. Vibracion straño den aire, rosea pisa di jaloezie of rabia of disgusto

Causa mas dolor cu susto

Mundo yegando su fin?

Kico falta, kico tin?

Tur ta papia di prohimo ruman, pa un miho mañan

Pero ta ofrece un pida pan?

Danki Dios pa nos madre patria Hulanda cu ta yuda sostene y inspira nos

Laga nos tin nos mesun bos den expresa nos pensamiento tur momento

Yuda nos islanan ABC

financieramente fielmente

Tabata algo chikito di Lady Ruth, algo di su curason y su mente den un intento di su pensamiento contento. Cu un oracion na mente pa nacionnan cu comportacionnan diferente.

Ruthy "Lady Ruth"
Januari 2026

DEPORTE INTERNACIONAL

Seahawks a caba na prome lugar di NFC West cu triunfo riba 49ers



SANTA CLARA: Zach Charbonnet den prome quarter a core pa 27 yarda y a anota un touchdown y Seattle Seahawks a para e atake poderoso di San Francisco 49ers, pa gana e wega 13-3. Cu e victoria Seattle ta sigura su mes di e posicion 1 den e playoffs di NFC. Seahawks (14-3) asina ta gana su prome titulo i division desde 2020. Door di perde e wega 49ers ta bay ta pafo di cas pa e rond di playoffs pa e Wild Card proximo weekend. Quarterback di Seattle Sam Darnold a completa 20 di su 26 pasenan, pa un total di 198 yarda, mientras cu e no a

wordo intercepta. Seahawks a depende hopi riba e wega di core. Kenneth Walker III a core pa 97 yarda, Charbonnet a anota e touchdown largo y Seattle a caba cu 180 yarda di coremento.

Di otro banda quarterback di 49ers Brock Purdy a completa 19 di su 27 pasenan, pa un total di 127 yarda. El a wordo intercepta 1 biaha, mientras cu Christian McCaffrey a wordo teni na apenas 23 yarda den e 8 biahnan cu el a core cu e bala.

Blue Jays a firma contrato di 4 año cu Okamoto na balor di 60 miyon dollar



TORONTO: Toronto Blue Jays a bay di acuerdo pa firma un contrato cu hungador di infield Japonés Kazuma Okamoto, segun Jeff Passan. Segun Jon Heyman di New York Post, e contrato ta na balor di 60 miyon dollar. E acuerdo ta inclui e bonus di firma di 5 miyon dollar y ningun clausula di opt-out.

Okamoto tabata un di e top hungadornan cu a subi e mercado di agencia liber despues di termina cu un av-

erage di bateo di .327 y un promedio di yega base di .416, pa Yomiuri Giants temporada pasa na Japon. El a caba tambe cu 15 homerun y 49 careda impulsa. Okamoto sinembargo a perde parti di e temporada debi na un lesion di elleboog. Pa loke ta su posicion den infield, e tin mas experiencia na tercera base, pero e ta wordo considera un primera base mihor cu average.

Brown a anota 50 punto pa yuda Celtics gana Clippers 146-115



INGLEWOOD: Jaylen Brown Diasabra a anota 50 punto pa yuda Boston Celtics gana Los Angeles Clippers 146-115.

Brown den tercer quarter so a anota 19 punto.

Derrick White a contribui pa Boston cu 29 punto, mientras cu Anfernee Simons a termina cu 15. Celtics den e ultimo simannan ta

bayendo hopi bon.

Nan a gana 7 di nan ultimo 8 weganan.

E maximo anotadornan pa Clippers tabata Kawhi Leonard y John Collins, ambos cu 22 punto.

Derrick Jones a contribui pa Los Angeles cu 19 punto, prome cu el a bandona we wega aparentemente cu un lesion di rudia.

Liverpool y Fulham a keda empata 2-2



INGLATERA: E wega entre Liverpool y Fulham Diadomingo tabata uno cu por a bay ambos banda. Fulham a tuma me ventaha den prome mitad, Liverpool a tuma e ventaha hopi laat y na final e wega a caba den un empate di 2-2. Cu e resultado aki Liverpool ta keda na di 4 lugar di Premier League cu 34 punto den 20 wega, mientras cu Fulham ta na di 11 lugar cu 28 punto. Tabata den di 17 minuut cu Harry

Wilson a anota pa duna Fulham e ventaha, pero den di 57 minuut Florian Wirtz a empata e wega pa Liverpool.

Ora cu tur hende tabata preparando pa e wega caba 1-1, Liverpool a parce di a gana e wega, ora cu den di 94 minuut Cody Gakpo a anota e 2-1.

Sinembargo, tres minuut despues Harrison Reed a anota e di dos gol di Fulham pa e wega caba den un empate.

Noticianan for di Hulanda

Crack birando problema grandi na Amsterdam



AMSTERDAM: Ta conoci cu na Amsterdam entre otro tin un problema di droga y e problema ta mustra di ta birando mas grandi.

Locual ta preocupa autoridadnan mas tanto no ta uso di marihuana, sino uso di locual ta wordo yama hard droga, esta cocaina y crack. Especialmente crack ta causante di problemanan bastante grandi den e ciudad.

Prensa Hulandes ta reporta cu uso

di droga pisa ta birando mas visible na Amsterdam, unda cu na diferente caminda esnan cu ta uza crack no ta ni sconde esaki.

A wordo reporta tambe cu muhernan adicto na e droga aki mas y mas ta bende nan curpa pa por haya placa pa compra e droga.

Mirando tur esaki municipio di Amsterdam a cuminsa cu un test pa combati e problemanan cu uso di crack ta causa den e ciudad.

Helicopter di polis a circula rond di pueblo na Gelderland pa busca posibel homber arma



APPELTERN: Den marduga di Diasabra pa Diadomingo polis a haci uso di un helicopter pa busca un homber cu posiblemente tabata cana arma.

Despues di varios ora a logra detene e sospechoso di Druten di 34 aña.

Mas trempa Diasabra e homber lo a maltrata y menaza un muhe den Appeltern, un pueblo den Gelderland.

Despues di e incidente e

sospechoso a core scapa for di e sitio, despues di cual polis a dicide di sali den grandi pa busca e homber.

Polis a haci todo por todo pa busca e persona, mirando cu nan a haya informacion cu posiblemente e lo tabata cana cu un arma di candela.

Na Beneden-Leeuwen habitantenan a wak con pa oranan largo e helicopter di polis tabata circula riba e pueblo.

Muher Hulandes cu tabata perdi a wordo haya na Roma despues di pasa cinco anochi den frieu



ROMA: Un muher Hulandes cu pa dianan caba tabata perdi na Italia a wordo haya bek bibo na Roma despues di cinco dia, hopi cerca di Vaticano.

Na Hulanda caba e muher na diferente ocasion tabata perdi.

Tur e tempo cu e tabata wordo busca Milly di 48 aña tabata pafo, unda cu tabata haci hopi frieu.

E muher na Hulanda ta conoci di ta un cliente di ggz, cu ta yuda personanan cu limitacionnan mental.

Den e siman cu a pasa prensa Italiano

a dedica hopi atencion riba e caso di desaparicion di e Hulandes.

Milly, kende tabata keda basta tempo na Toscana y por papia Italiano, un tiki despues di Pasco diripiente a desaparece sin documentonan y sin un celular.

E pastoor cu tabata cuida Milly a bati alarma cerca polis ora cu el a desaparece.

Ora cu Milly a wordo haya el a wordo transporta pa hospital den un estado preocupante di salud.

KLM a scrap centenares di buelo na Schiphol Diadomingo



AMSTERDAM: Diadomingo debi na e weer di winter KLM a anula centenares di buelo na Schiphol.

Riba Diabierna y Diasabra caba tabata tin un cantidad grandi di buelo cu a cay afo, mientras cu tabata tin varios caso di retraso.

Segun KLM ta trata di 295 buelo cancela Diadomingo.

Riba Diabierna KLM a anula 114 buelo, mientras cu Diasabra 73

mas a wordo cancela.

Schiphol ta wordo confronta cu disturbionan causa pa caida di sneu, ijs pega na avionnan y direccion di biento no favorable.

E aeropuerto a conseha pasaheronan pa busca bon informacion pa determina si nan buelo ta wordo cancela y ki ora of dia nan por tuma otro buelo.

Noticia Internacional

Marco Rubio a papia tocante e transicion na Venezuela:

“María Corina ta fantastico pero nos ta tratando cu e realidad inmediato”

WASHINGTON: Gobierno di Merca a laga sa bon cla cu lo mantene “multiple palanca di presion” riba Venezuela despues di e detencion di Nicolás Maduro, mientras nan ta warda loke e ta considera e “decisionnan apropiada” di e autoridadnan chavista, Secretario di Estado Marco Rubio a bisa den un entrevista cu CBS News diadomingo.

E Secretario di Estado a enfatisa cu, na lugar di impone un gobierno transitorio dirigi pa figuranan di oposicion, Washington ta dispuesto pa traha cu Delcy Rodríguez y e resto di e gabinete chavista, basta nan “tuma e decisionnan corecto.”

Rubio tambe a expresa su apoyo na e lider di oposicion Venezolano y laudado di Premio Nobel di



Paz di 2025, María Corina Machado, kende el a califica como “fantastico”.

“María Corina Machado ta fantastico, y e ta un hende cu mi conoce pa hopi tempo. Henter e movicion aki ta pa motibo di dje”, el a bisa.

Sin embargo, el a argumenta cu, den e situacion actual, e enfoke di Washington ta marca pa e urgencia di atende e retonan

inmediato na Venezuela, unda un parti significativo di oposicion ta den exilio.

“E realidad inmediato ta cu, lamentablemente, y lamentablemente, e gran mayoria di oposicion no ta presente mas dentro di Venezuela. Nos tin asuntunan a corto plazo cu mester wordo atendi inmediatamente. “Nos tur kier un futuro briyante pa Venezuela, un transicion

pa democracia,” Rubio a splica, mientras el a señala cu e siguiente siman y lunanan lo ta crucial pa interesnan di Merca y estabilidad regional.”

Rubio a afirma cu e administracion Mericano lo evalua su siguiente pasonan a base di e accionnan tuma pa e lidernan Venezolano, reiterando cu “si nan no tuma e decision corecto, Merca lo mantene multiple palanca di presion.”

E funcionario Mericano tambe a aclarea cu Merca no ta den guerra cu Venezuela, sino contra e organisacionnan di traficacion di droga cu ta opera den e pais.

“Nos ta enforsando leynan di Merca pa loke ta trata sancionnan di petroleo. Nos a sanciona entidadnan. Nos ta bay Corte, nos ta

obtene un orden di Corte, nos ta confisca e barco nan petrolero y esey lo sigui. Pues, laga mi ta bon cla... nos lo sigui reserva e derecho di realisa atakenan contra barconan di droga cu ta trece droga na Merca,” el a bisa.

E declaracion di Rubio a bin despues di un operacion den cual comandonan Mericano a captura Maduro den un compleho na Caracas diasabra, uzando avionnan, helicopternan, barconan di guerra y tropnan terrestre.


- Advertencia di Marco Rubio na e regimen Cubano despues di e caida di e dictador Nicolás Maduro. Rubio a declara diasabra cu e regimen Cubano mester sinti “preocupa” despues di e operacion lidera pa Washington cu a culmina den e captura di e dictador Venezolano Nicolás Maduro, argumentando cu e caida di poder na Caracas a expone Cuba su papel central den e aparato di seguridad di e regimen Venezolano.

E declaracion a wordo haci den un conferencia di prensa hunto cu presidente Donald Trump, algun ora despues di e operacion den e capital Venezolano.

“Si mi tabata den e gobierno na Havana, lo mi tabata preocupá,” Rubio a bisa, describiendo e aresto di Maduro como un golpe directo pa e estructura di inteligencia Cubano na Venezuela.

Segun e titular di diplomacia Mericano, Havana a logra un nivel profundo di control riba sistemanan di seguridad Venezolano, te na e punto di influencia e proteccion personal di e dictador na Caracas y agencianan estatal clave.

Merca a kita restriccion di vuelo den Caribe implementa despues di e atake riba Venezuela



Secretario di Transporte di Merca, Sean Duffy, a anuncia diasabra anochi cu e restriccionnan di espacio aereo den Caribe, implementa e mainta ey despues di e atake di Merca riba Venezuela, lo wordo kita diadomingo mainta tempran, dia 4 di januari.

“E restriccionnan original

riba espacio aereo di Caribe ta caduca pa 00:00 ET y vuelonan por reanuda. Aerolineanan a wordo informa y lo actualisa nan eskema pronto. Por fabor sigui tuma contacto cu bo aerolinea si bo vuelo a wordo afecta pa e restriccionnan,” e funcionario Mericano a informa via su

perfil riba e red social X. Mas tempran, el a señala cu den oranan tempran di diasabra, den apoyo di e Departamento di Guerra, Administracion Federal di Aviacion (FAA) a restringi espacio aereo den Caribe y Venezuela pa garantisar seguridad di e pasaheronan. Durante oranan di mardu-

ga, Merca a lansa un atake riba varios punto den territorio Venezolano, incluyendo Caracas, y a captura presidente Nicolás Maduro y su casa, Cilia Flores. Ambos a wordo traslada posteriormente, via lama y aereo, pa New York, unda nan lo enfrente un proceso legal riba acusacionnan di traficacion di droga, entre otro.

Pa motibo di esaki, aerolineanan grandi di Merca a wordo obliga pa cancela centenares di vuelo den Caribe diasabra. E medida a afecta companianan manera American Airlines, Delta Air Lines, Jet-Blue, Southwest Airlines, y United Airlines.

Noticia Internacional

Delcy Rodríguez ta pidi pa “defende Venezuela” y ta contradeci e version di Trump cu e ta colaborando cu Merca

CARACAS: “Loke nan ta haciendo na Venezuela ta un barbarie”. Delcy Rodríguez, vicepresidente ehecutivo di Venezuela, tabata asina enfatico durante un discurso cu el aduna e pais na radio y television nacional riba diasabra, despues di e operacion realisa pa Merca na Caracas.

Rodríguez a describi e accionnan aki como un “secuestro ilegal y ilegítimo di Presidente Nicolás Maduro y Prome Dama Cilia Flores.”

“Loke nan a haci cu Venezuela, nan por a haci cu

cualquier hende”, el a enfatisa.

Rodríguez a hiba palabra den loke tabata su di dos discurso di dia, despues cu presidente di Merca Donald Trump a subraya den un conferencia di prensa cu e lo percura pa Venezuela “ta wordo maneha debidamente.”

Trump, leu di menciona cualquier nomber Venezolano, a contesta pregunta di un periodista riba ken lo goberna Venezuela, el a mostra riba su mes y e Secretario di Estado di Merca, Marco Rubio, bisando cu “pa un tempo, lo ta pa gran

parti e hendenan mi tras.”

Pero e tambe a bisa algo den referencia na Delcy Rodríguez: “El a caba di huramenta. Pero, manera bo sa, el a wordo elegi pa Maduro. Pues Marco (Rubio) ta trahando riba esey directamente. El a djis papia cu ne (Delcy Rodríguez) y e ta dispuesto pa haci loke cu nos ta considera necesario pa Venezuela bira grandi atrobe.” E contesta di Rodríguez tabata lo contrario, ya cu el a bisa cu Venezuela ta “un pueblo cu no ta entrega, no



lo entrega, y nunca lo ta un colonia di niun hende, ni di imperionan antiguo, ni di esnan nobo, ni di esnan

den decadencia.”

Y el a afirma: “Nos ta cla pa defende Venezuela.”

Mensahe di María Corina Machado

despues di e atakenan di Merca:

“Venezolanonan, e momento pa libertad a yega”



CARACAS: Den un mensahe publica diasabra mainta, e lider di oposicion María Corina Machado a declara cu “e momento pa libertad a yega” y a señala cu presidente Nicolas Maduro “ta enfrenta husticia internacional for di awo padilanti pa crimennan atos,” meéntas e ta haci un yamada na ciudadanonan pa keda “vigilante, organisa, activo, avansa den direccion di un transicion democratico.

E declaracion, cu fecha 3 di januari 2026, y firma pa e lider venezolano, ta sostene cu, despues di e rechaso di Maduro pa acepta un solucionnan negocia, “gobierno di Merca a cum-

ppli cu nan promesa di mantene leynan.” Sinembargo, e no a indica e detayenan di e afirmacion aki of e accionnan legal cu ta tumanando lugar.

Den e texto, e lider di oposicion a argumenta cu ta tempo pa “soberania popular y soberania nacional prevalece den nos pais” y ta lista como obhetivonan inmediato “restauracion di orden, liberacion di presonan politico, construi un pais excepcional y trece nos yiunan cas.” “Nos a lucha pa añanan, nos a duna tur cos, y e tabata bale la pena. Loke mester a pasa ta pasando,” e ta declara.

Despues di e operacion militar Mericano na Venezuela

Gobierno di Colombia a convoca un reunion di CELAC



Diadomingo 4 di januari 2026, a keda confirma cu gobierno di Colombia, encabeza pa Gustavo Petro, a convoca un reunion di ministernan di asuntonan exterior di e Comunidad di Estadonan Latinoamericano y Caribense (CELAC). Esaki tabata cu e meta pa defini un posicion regional pa loke ta trata e operacion militar di Merca na Venezuela, cu a resulta den captura di Nicolás Maduro y su casa, Cilia Flores.

E directora di e departamento administrativo di e presidencia di e Republica (Dapre), Angie Rodríguez, a informa cu e reunion ta busca pa coordina un respuesta conhuntito di e region pa e atake di Merca. Rodríguez a remarca cu

presidente Gustavo Petro ta ocupa e presidencia pro tempore di CELAC.

Esaki ta nifica cu ta duna Colombia un rol central den e coordinacion diplomatico di e situacion.

E declaracionnan a wordo haci na Cúcuta (Norte de Santander), e crusada principal di frontera cu Venezuela, unda gobierno Colombiano a instala un puesto di mando unifica (PMU) como respuesta na e sucesonan.

Gobierno di Brasil (lidera pa Luiz Inácio Lula da Silva) a declara cu nan ta considerando tene e reunion ministerial di CELAC diadomingo, den un formato di videoconferencia, despues di merdia. Confirmacion final ta pen-

diente e presidencia di e organisacion, cu ta ocupa pa Colombia.

Colombia, den su calidad di miembro no permanente di Consejo di Seguridad di Nacionnan Uni, tambe a promove convocacion di un reunion urgente di e organo aki, programa pa dialuna.

E proposicion a haya respaldo di Rusia y China, miembronan permanente di e Consejo, y a wordo aproba pa e presidencia rotativo, cu e luna aki ta pertenece na Somalia.

Ademas di tur loke ariba menciona, gobierno di Colombia a pidi un sesion extraordinario di e Consejo Permanente di e Organizacion di Estadonan Mericano (OEA), den liña cu e mensahe publica pa presidente Petro riba e red social X durante e prome oranan di diasabra 3 di januari. E desaroyo di e reunionnan internacional aki lo ta clave pa defini e reaccion regional y internacional riba e intervencion militar y su consecuencianan politico na Venezuela y den e region.

Rubio ta bisa cu Merca lo sigui ataca barconan sospechoso den Caribe

WASHINGTON: Secretario di Estado di Merca Marco Rubio a adverti diadomingo cu su pais lo sigui ataca barconan supuestamente vincula cu trafica-cion di droga como parti di e campaña antidroga di Washington den Caribe, y a insinua cu nan lo sigui confiscar barconan di petroleo sanciona.

“Nos lo sigui ataca barconan cu ta trafica droga si nan purba yega Merca,” Rubio a bisa den un entrevista cu NBC News, un dia despues cu forsanan Mericano a captura presidente Venezolano Nicolas Maduro na Caracas y cu a wordo traslada pa New York pa e wordo huzga pa narcoterrorismo y corrupcion.



E secretario di Estado Mericano a agrega cu su pais lo sigui “confisca barconan cu ta wordo sanciona cu ordo di Corte”, den aparente referencia na e confiscacion di barconan petrolero cu ta transporta petroleo Venezolano cu Washington a realisa den e ultimo siman pa presiona gobierno di Maduro. Segun Rubio, e accionnan aki lo sirbi pa Caracas “resolvi” nan problemanan. “Nos lo sigui haci esey, y potencialmente otro cosnan, te ora cu e asuntonan cu nos mester mira re-

solvi wordo atendi”, el a agrega, refiriendo na gobierno Venezolano, lidera pa ex-vice presidente y awor presidente interino, Delcy Rodríguez. Tambe el a insisti cu Merca no ta “den guerra cu Venezuela” pero “contra organizacionnan narcotraficante” y a declara cu nan a haci un “avance grandi” caba den e sentido aki cu e captura di Maduro, cu e administracion di presidente Donald Trump ta acusa di ta lidera e Cartel de los Soles. U.S. Joint Chiefs of Staff, Dan Caine, a adverti dias-

bra cu Merca lo mantene su despliegue militar extenso den Caribe como parti di nan campaña contra trafico di droga. “Nos forsan ta keda den e region den alerta halto, prepara pa proyecta poder, defende nan mes y nos interesnan den e area,” Caine a specifica den un conferencia di prensa hunto cu Trump y Rubio pa informa riba e operacion relampago pa saca e dictador Venezolano for di Caracas.

Aurora
Royal Prayer
Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699
E.: info@aurorafuneralaruba.com

Josef Eloy Ridderstaat
Cariñosamente yama: Boes,
Jose of Djo
* 02-12-1950 - †25-12-2025

Na number di su mayornan:
†Joseph (Cheppy) y †Dorothea (Do)
Yiunan: Feniska y yiunan
Javier, Esposa y yiunan
Tatiana y yiunan
Nieto y nietanan
Ex-casa: Jacinta Henríquez
Rumannan: Ita y Henk Monah-Ridderstaat
Luly Ridderstaat y fam
Vito Ridderstaat y fam.
Mayki Ridderstaat y fam.
Semi y Dita Ridderstaat-Tromp y famia
Maria Ridderstaat y famia:
Annie y Nelson Blancheville-Ridderstaat
Rebeca Ridderstaat y famia
Miro Ridderstaat
Jorge Ridderstaat
Rene Ridderstaat

Swa y cuñanan
Tantanan: Juana Faro-Ridderstaat
Stefanita Tomp-Gil
Brigida de Cuba-Gil
Demas Tanta y Omonan †

Primo y primanan, comer y compernan, Amigo y amiganan
Ex coleganan di su trabao, Amigo nan Refree di FIFA, BBV
Su amigo Refree na Aruba Hubert (Porois) Tromp
Demas famia: Ridderstaat, Gil, Gusman, Henríquez, Erasmus, Boekhoudt, Tromp, Hughes, Obispa, Farro, Roos, Zara, Matos, Bomba, Arends, de Cuba, Hlil, Blancheville, D'Aquiar, Zievinger, Monah, Iacle, Martina.

Nos disculpa si den nos tristesa nos por a lubida di menciona algun famia.

Acto di despedida lo tuma lugar diaranson 7 di januari 2026 na Bonaire.

Diasabra 10 di januari 2026 lo tin un santo sacrificio di misa na Misa Santa Anna na Noord pa 7:00 pm

Oracion pa awe:

SEÑOR, Bo ta sigui duna nos e señalnan pa nos lesa y comprende Bo voluntad, pero tin hopi cos ta distrae nos. No laga nos perde Bo ma, pa bo gracia laga nos yega mas cerca Bo. Danki Señor pa bo Luz.

**AMEN.
G.C.P.A**

Aurora
Royal Prayer
Funeral Home & Crematory

Cumana # 76 & # 44
van Speyckstraat # 1
Oranjestad, Aruba
T.: (297) 588-6699
E.: info@aurorafuneralaruba.com

**“Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forsa”.**
Salmo: 23

Nos ta anuncia fayecimento di:

Paulito Pablo Dirksz
*13-08-1950 - †30-12-2025

Acto di entierro lo wordo anuncia despues.

Pa chica Pos - Habri tubería y wc.
Servicio lihe y confiabel.
Experiencia ta manda
CICLONE
Septic Tank Service
Tel: 564-0607 / 734-0607

WASMACHINE
Ta drecha wasmachine,
dryer, stoof, forno.
Ta drecha, service y instala
airco. Tel: 742-2518.
Ta drecha na cas mes.

TA CHAPI
Corta mata.
Ta tira sushi afo. Nos
ta hardineria completo
na super bon prijs.
Tel: 569-8003

NOS TA DRECHA
Frigidaire,
wasmachine, dryer,
airco, cooler.
Tel: 566-4366

DIARIO
Pa noticia, cumpleaños,
comentario, redaccion:
noticia@diario.aw
Tel: 582-6747

SUPERCARD SUPERDEALS



**BEST CINEMA AT
THE BEST PRICES!**

**COMFORT
CLASS**

IMAX

VIP

Monday Thursday	Friday Sunday
8.00 ^{AWG}	9.00 ^{AWG}
10.00 ^{AWG}	11.00 ^{AWG}
11.00 ^{AWG}	12.00 ^{AWG}

Sign up today at any **The Movies** location
and **start enjoying great benefits!**

Eduard Pieters (PPA):

Awo mas cu nunca Aruba mester confia den su sistema di maneho di crisis

***Mester actua firmemente den e situacion conflictivo entre Merca y Venezuela**

ORANJESTAD (AAN): E noticia cu Forsanan Arma di Merca a drenta Caracas y a captura Nicolas Maduro y su casa, Cilia Flores, a manda un ola di impacto rond mundo y a pone Aruba den un estado di alerta maximo. Consecuencia di esaki y segun conseho di Reino Hulandes ta pa cera e espacio aereo diasabra 3 di januari 2026 y lo evalua ki dia esaki lo por habri bek.

Logicamente e decision aki tin su impacto economico riba nos isla. Ademá, nos ta spera cu e situacion geopolitico lo por mehora pa nos operacionnan por bira normal bek.

Fraccion di PPA for di luna di september 2025 caba a manda carta via presidente di parlamento pa yama un reunion urgente pa nos por trata e situacion aki cu a sigui escala te na captura di sr. Maduro y su casa.

Pakico fraccion di PPA tabata y ta sigui ta insistente pa nos

por tin dialogo cu gobierno? Pasobra den e ultimo 10 añanan Aruba a traha duro riba un sistema y maneho di crisis pa mitiga of elimina cualkier consecuencia negativo cu un menasa eminente, di salud publico, medio ambiente, cibernetico, geopolitico of di guerra, por tin riba nos isla. Eduard a elabora: "Crisis Management Office (CMO) den un forma estructural a sa di coordina e trabounan pa haci nos isla mas resiliente.

CMO ta un instancia maneha pa nos propio yiunan di tera cu a percura pa profesionalisa y haya guia di profesionalnan internacional pa Aruba ta mas resiliente y por bons bek mas lihe posibel den caso di un menasa y calamidad.

Aruba a demostra cu e sistema di maneho di crisis a funciona durante e pandemia di COVID-19. Aruba a sa di bons bek y a percura pa mitiga hende fayece na

gran escala y pa un maneho economico financiero solido despues di a wordo destroz pa e consecuencianan durante y desoues di e pandemia di COVID-19."

Awo Aruba ta confronta otro menasa. Eduard a sigui relata: "Den luna di december fraccion di PPA, despues di a experiencia un reunion publico na Hulanda caminda e ministernan Hulandes a presenta 4 diferente scenario como consecuencia di e conflicto entre Merca y Venezuela, a reuni bek den un Seniorenen Convent cu gobierno y a urgi gobierno pa sigui haci uzo di maneho di crisis coordina pa CMO pa evita cu cosnan por bay robes." Algun ehempel concreto di esaki ta con e instancianan concerni (ATA, AHATA, DEHZI, etc) por mitiga cu nos economia lo sufri grandemente.

Pero tambe un inventariacion di varios otro instancia pa logra haya sa kico tur Aruba tin na recurso (logistica)

pa sobrebibi ausencia di importacion di cuminda, fuel, etc. Nos por a ripara cu diasabra minister presidente porfin a declara parti di inventarisacion cu nos propio profesionalnan bou coordinacion di e crisisteam a haci.

"Aruba a pasa den un crisis di salud publico mundial. Nos a siña di dje y sigur nos por aplica intervencionnan exitoso di pasado den e situacion actual.

Nos mester mustra liderazgo y laga nos expertonan local den colaboracion cu otro expertonan internacional haci nan trabou." Eduard di fraccion di PPA a sigui bisa.

"Nos no mester inventa e wiel di nobo. Nos profesionalnan den e sistema di maneho di crisis sa kico pa haci. Como bon lider nos mester confia



den nan y laga nan haci nan trabou cu e meta comun (den e caso aki) pa no perhudica nos economia ni siguridad di Aruba y mas ainda no sembra panico riba e isla.

E ta un situacion serio pero nos no mester bay den panico. Nos mester tuma accion cla segun conseho di nos profesionalnan cu ta conforma e team di crisis di Aruba. Dios bendiciona nos isla y cu Spirito Santo ilumina nos gobernantenan y profesionalnan" Eduard ta conclui.

**THIS JANUARY
THIS JANUARY**

**JUST
GREAT PRICES.**

**ONLY AT
AMC UNICON.**

SHOP TODAY

**AND GET UP TO
2 FREE
INSTALLMENTS!**

NOW WHEN YOU SHOP, GET CREDIT AT THE CASH PRICE
25% OFF YOUR INTEREST RATE ON ALL PLANS

PLUS **FREE DELIVERY**
FOR CREDIT CUSTOMERS
LIMITED TIME. SHOP NOW.

NO HIDDEN FEES | NO COLLATERAL | APPROVAL IN 24 HOURS



TCL 65"
QLED 4K UHD GOOGLE
SMART TV
65P8KA
**NOW
AWG1099**
WAS AWG1299



TCL 43"
QLED FLAT ANDROID
GOOGLE SMART TV
43S5KA
**NOW
AWG499**
WAS AWG599.99



LG 75"
4K UHD AI THINQ
WEBOS SMART TV
75UQ7590PUB
**NOW
AWG1499**
WAS AWG2499.99



LED 55"
ULTRA HD 4K
SMART TV
UN55UB000FPXPA
**NOW
AWG999**
WAS AWG1299.99



SAMSUNG 75"
ULTRA 4K FLAT TIZEN
SMART TV
QN75Q7FAAPXPA
**NOW
AWG2199**
WAS AWG2699.99



**SAVE
AWG151**
**LG 720 WATT
MINI AUDIO SYSTEM**
CJ45DPANLLK

**NOW
AWG349**
WAS AWG499.99



**JBL
PARTY BOX**
JBLPBENCORE22MICAM
**NOW
AWG699**
WAS AWG799.99

CONDITIONS APPLY.




569-2407
AMC EAGLE MEGASTORE

HORARIO: 9am - 6pm DIALUNA PA DIASABRA



Auto di huur a perde control y ranca palo di luz completo riba Avenida Nelson Oduber



ORANJESTAD (AAN): Tabata Diadomingo mainta trempa den careda di 7'or, cu Central di Polis a dirigi un patruya riba riba Avenida Nelson Oduber, debi cu yamadan a dren- ta cu un auto a accidenta.

E prome patruya cu a yega, a bin nota cu riba e pida caminda di Palm Beach direccion Bubali di

Avenida Nelson Oduber, net pariba di Bubali Plas, un auto sedan Nissan Versa color blanco cu V-nummer, bayendo direccion zuid y a perde control ranca un palo di luz.

E auto a keda basta destrui parti dilanti, y tambe na e parti robez. E palo di luz mes a haya un deuk, pero a keda toch stabil unda e

impacto tabata.

Polis a check cu e ocupante, y a bin haya sa cu ningun hende a resulta herida. }

Pero a manda busca Take- lswagen di e compania di huur auto, debi cu esaki no tabata por a core mas. Daño material ta fuerte, y e palo di luz lo tin di wordo cambia tambe.

